

Cod Ymddygiad ar Safonau Ymddygiad Aelodau o'r Senedd

Mae'r ddogfen hon yn nodi'r safonau ymddygiad a ddisgwylir gan Aelodau o'r Senedd.

Diweddarwyd: 18 Mawrth 2026 i ddod i rym ar ddechrau'r Seithfed Senedd

Perchennog: Y pwyllgor sy'n Gyfrifol am Safonau Ymddygiad

Cyswllt: Clerc y Pwyllgor sy'n Gyfrifol am Safonau Ymddygiad



Rhan 1 – Cyflwyniad a Statws y Cod

1. Mae'r Cod Ymddygiad hwn ("y Cod") yn cynnwys:
 - Rhan 1 Cyflwyniad a statws y Cod
 - Rhan 2 Dehongli ac Egwyddorion Cyffredinol
 - Rhan 3 Safonau Ymddygiad Personol yr Aelodau
2. Mae'r Cod yn nodi'r safonau ymddygiad sy'n ofynnol gan Aelodau o'r Senedd, ac mae'n God sy'n ymwneud ag ymddygiad Aelodau o'r Senedd at ddibenion Mesur Comisiynydd Safonau Cynulliad Cenedlaethol Cymru 2009. Mabwysiadwyd y Cod presennol trwy benderfyniad y Senedd ar 18 Mawrth 2026.
3. Mae'r Llywydd a chadeiryddion pwyllgorau fel arfer yn ymdrin ag ymddygiad Aelodau yn ystod Cyfarfodydd Llawn y Senedd ac mewn pwyllgorau trwy ddefnyddio Rheolau Sefydlog y Senedd sy'n ymwneud â chynnal trefn yn ystod trafodion. Os bydd y Llywydd neu gadeirydd y pwyllgor, wrth ymdrin â mater o'r fath, o'r farn bod angen ymchwilio i'r ymddygiad ymhellach neu'n llawnach, gall gyfeirio'r mater at Gomisiynydd Safonau'r Senedd. O ran datganiadau buddiannau, gellir gwneud cwynion yn uniongyrchol i'r Comisiynydd Safonau, a all ymgynghori â'r Llywydd/cadeirydd y pwyllgor perthnasol. Yn gyffredinol, os yw'r amgylchiadau'n gofyn am ymchwiliad manwl, yna bydd yn aros gyda'r Comisiynydd i'w ymchwilio.
4. Yn ogystal â'r Cod hwn, rhaid i Aelodau gydymffurfio â Rheolau Sefydlog y Senedd ac unrhyw godau/protocolau a bennir ganddynt, gan gynnwys y rhai sy'n ymwneud â datgan a chofrestru buddiannau ariannol a buddiannau eraill ac aelodaeth o gymdeithasau. Dylid cyfeirio achosion honedig o dorri'r Rheolau Sefydlog hyn yn uniongyrchol at Gomisiynydd Safonau'r Senedd i ymchwilio iddynt yn hytrach na'r Llywydd/Cadeirydd y Pwyllgor perthnasol. Am y rheswm hwn, nid yw'r Cod yn cynnwys Rheol sy'n mynd i'r afael â datgan a chofrestru buddiannau o'r fath.
5. Gall Comisiwn y Senedd gyhoeddi canllawiau o bryd i'w gilydd i gynorthwyo Aelodau a'u staff i gydymffurfio â'r Cod, a gall Comisiynydd Safonau y Senedd roi sylw i ganllawiau o'r fath wrth ystyried unrhyw gŵyn o fethiant i gydymffurfio â darpariaethau'r Cod.
6. Mae'r Cod yn gymwys i Aelodau sy'n dal swydd gyhoeddus Aelod o'r Senedd bob amser, gan gynnwys ym mywydau personol a phreifat yr Aelodau.

7. Nid yw'r Cod yn gymwys:

- i. i'r Llywydd neu gadeirydd pwyllgor mewn perthynas ag arfer y swyddogaethau a roddir gan ddeddfiad, y Senedd neu'r Rheolau Sefydlog.
- ii. pan fo Aelod yn gweithredu'n gyfan gwbl yn rhinwedd ei swydd fel Prif Weinidog Cymru, un o Weinidogion Cymru neu fel Cwnsler Cyffredinol a bod ei ymddygiad yn cael ei lywodraethu gan God Gweinidogion Cymru fel y'i diffinnir yn adran 8(2)(a) o'r Mesur.
- iii. mewn perthynas â safon y gwasanaeth a'r canlyniadau a gafwyd gan Aelod.

Rhan 2 - Dehongli ac Egwyddorion Cyffredinol

8. Rhaid i Aelodau ymddwyn yn unol â'r Egwyddorion a ganlyn (y cyfeirir atynt yn y Cod fel "yr Egwyddorion Cyffredinol").

Anhunanoldeb

Rhaid i Aelodau wneud penderfyniadau er lles y cyhoedd yn unig. Ni chânt wneud penderfyniadau er mwyn iddynt hwy neu unrhyw berson arall elwa'n ariannol neu'n faterol, a hynny mewn modd amhriodol neu fodd nas caniateir.

Uniondeb

Ni chaiff Aelodau roi eu hunain o dan unrhyw rwymedigaeth ariannol neu rwymedigaeth arall tuag at unigolion neu gyrff allanol a allai geisio dylanwadu arnynt wrth iddynt gyflawni eu dyletswyddau swyddogol. Rhaid i Aelodau bob amser ymddwyn mewn ffordd na fydd yn tanseilio ffydd a hyder y cyhoedd yn uniondeb y Senedd ac osgoi unrhyw ymddygiad a fydd yn dwyn anfri ar y Senedd neu ar ei Haelodau yn gyffredinol.

Gwrthrychedd

Wrth gyflawni eu busnes, rhaid i Aelodau wneud penderfyniadau yn ôl haeddiant.

Atebolrwydd

Mae Aelodau yn atebol i'r cyhoedd am eu penderfyniadau a'u gweithredoedd a rhaid iddynt wneud eu hunain yn destun pa bynnag archwiliad sy'n addas i'w swydd gyhoeddus fel Aelodau o'r Senedd.

Bod yn agored

Rhaid i Aelodau fod mor agored â phosibl ynghylch yr holl benderfyniadau a gweithrediadau a wneir ganddynt. Rhaid iddynt roi rhesymau dros eu penderfyniadau a chyfyngu ar wybodaeth dim ond yn unol â gofynion statudol, Rheolau Sefydlog y Senedd a rheolau sy'n rhwymo Aelodau o'r Senedd a'u staff, neu pan fo budd y cyhoedd ehangach yn amlwg yn mynnu hynny.

Gonestrwydd

Rhaid i Aelodau fod yn onest, rhaid iddynt ddatgan unrhyw fuddiannau preifat sy'n berthnasol i'w dyletswyddau cyhoeddus a rhaid iddynt gymryd camau i ddatrys unrhyw achosion o wrthdaro a allai godi mewn modd sy'n diogelu buddiannau cyhoeddus.

Parch

Ni chaiff Aelodau ymddwyn mewn modd sy'n lleihau cyfle cyfartal, rhaid iddynt barchu urddas pobl eraill a pheidio ag ymddwyn yn wahaniaethol neu mewn modd nas dymunir.

Arweinyddiaeth

Rhaid i Aelodau hyrwyddo a chefnogi'r Egwyddorion hyn trwy arweinyddiaeth a dangos esiamp, a bod yn barod i herio ymddygiad gwael lle bynnag y mae'n digwydd.

9. Mae'r Safonau Ymddygiad Personol a nodir yn Rhan 3 o'r Cod hwn i'w dehongli yn unol â'r Egwyddorion Cyffredinol ac mae torri'r Cod yn golygu torri unrhyw un o'r safonau a nodir yn Rhan 3 o'r Cod hwn.

10. Yn y Cod hwn:

- ystyr "bwlio" yw ymddygiad tramgwyddus, bygythiol, maleisus neu sarhaus; neu gam-drin neu gamddefnyddio pŵer mewn ffordd sy'n bwriadu tanseilio, bychanu, beirniadu'n annheg neu anafu rhywun, naill ai trwy ymddygiad parhaus neu un weithred annerbyniol iawn;
- mae "gwahaniaethu" yn cynnwys ymddygiad sy'n gwahaniaethu yn erbyn unrhyw berson ar sail oedran, anabledd, ailbennu rhywedd, priodas a phartneriaeth sifil, beichiogrwydd a mamolaeth, hil, crefydd neu gred, rhyw, cyfeiriadedd rhywiol, barn wleidyddol a dewis iaith;
- ystyr "aflonyddu" yw ymddygiad nas dymunir sydd â'r diben neu'r effaith o darfu ar urddas unigolyn neu sy'n creu amgylchedd bygythiol, gelyniaethus, diraddiol, bychanol neu sarhaus i unigolyn ac sy'n cynnwys aflonyddu rhywiol;
- ystyr "ymddygiad nas dymunir" yw ymddygiad nad yw'n cael ei annog na'i dderbyn gan y dioddefwr, ni waeth a fwriadwyd iddo beri tramgwydd, ac ni waeth a yw'n digwydd mwy nag unwaith neu a yw'n ddigwyddiad unigol; ac
- ystyr "y Mesur" yw Mesur Comisiynydd Safonau Cynulliad Cenedlaethol Cymru 2009 (*mccc 4.*)

11. Wrth ddehongli a chymhwyso'r diffiniadau o "fwlio", "aflonyddu", "gwahaniaethu" ac "ymddygiad nas dymunir":

- mae bwriad y person y gwneir cwyn amdano yn amherthnasol.
- y prawf yw a fyddai person rhesymol a diduedd o'r farn y byddai'r ymddygiad yn dod o fewn un o'r diffiniadau gan roi sylw i gyd-destun yr ymddygiad y gwneir cwyn amdano.
- rhaid parchu hawliau perthnasol y person y gwneir cwyn amdano a'r person sy'n ddarostyngedig i'r ymddygiad o dan sylw o dan Ddeddf Hawliau Dynol 1998.

Rhan 3 – Safonau Ymddygiad Personol Aelodau

12. Rhaid i Aelodau gydymffurfio â'r Rheolau Ymddygiad a ganlyn:

Rheol 1

Rhaid i Aelodau gynnal yr Egwyddorion Cyffredinol.

Rheol 2

Rhaid i Aelodau:

(a) weithredu'n onest; a

(b) peidio â gwneud datganiadau sy'n fwriadol gamarweiniol.

Rheol 3

Rhaid i Aelodau gywiro'r cofnod cyn gynted â phosibl os ydynt wedi gwneud datganiad sy'n anghywir neu'n fwriadol gamarweiniol.

Rheol 4

Ni chaiff Aelodau ymddwyn mewn modd sy'n dwyn anfri ar y Senedd neu ei Haelodau yn gyffredinol.

Rheol 5

Ni chaiff Aelodau ymddwyn mewn modd nas dymunir, aflonyddu, bwlio na gwahaniaethu.

Rheol 6

Rhaid i Aelodau gynnal y gyfraith droseddol. Ystyrir bod Aelod wedi methu â chynnal y gyfraith droseddol dim ond os yw'n cael ei euogfarnu o drosedd neu os yw'n cyfaddef trosedd yn ffurfiol.

Rheol 7

Ni chaiff Aelodau ymosod yn bersonol ar unrhyw un — mewn unrhyw ohebiaeth (naill ai ar lafar neu'n ysgrifenedig, ar ffurf electronig neu drwy unrhyw gyfrwng arall) — mewn modd a fyddai'n cael ei ystyried yn ormodol neu'n ymosodol gan berson rhesymol a diduedd, gan ystyried y cyd-destun y gwnaed y sylwadau ynddo.

Rheol 8

Rhaid i Aelodau ddatrys unrhyw achosion o wrthdaro sy'n codi rhwng eu buddiannau preifat a budd y cyhoedd ar unwaith, ac o blaid budd y cyhoedd.

Rheol 9

Rhaid i Aelodau gydymffurfio â'r Rheolau a wneir o bryd i'w gilydd gan Glerc a Phrif Weithredwr y Senedd fel Prif Swyddog Cyfrifo Comisiwn y Senedd ar y defnydd o adnoddau a ddarperir i Aelodau gan Gomisiwn y Senedd.

Rheol 10

Ni chaiff Aelodau gamddefnyddio taliadau nac adnoddau sydd ar gael iddynt o dan benderfyniad Bwrdd Taliadau Annibynnol y Senedd.

Rheol 11

Rhaid i Aelodau fod yn gyflogwyr cyfrifol.

Rheol 12

Ni chaiff Aelodau dderbyn unrhyw gymhelliant ariannol, rhodd, lletygarwch neu fudd arall fel cymhelliant neu wobwr am gyflawni eu swyddogaethau fel Aelodau, am ddylanwadu ar drafodion yn y Senedd, neu a allai fel arall ymddangos i berson rhesymol a diduedd i ddylanwadu, neu o bosibl ddylanwadu ar eu gweithredoedd fel Aelod, ac eithrio i'r graddau y mae eu derbyn yn cydymffurfio â'r ddarpariaeth a wneir mewn Rheolau Sefydlog.

Rheol 13

Ni chaiff Aelodau ddefnyddio na cheisio defnyddio eu statws fel Aelod i roi mantais neu driniaeth ffafriol i'w hunain neu i unrhyw berson arall, neu i osgoi anfantais neu greu anfantais i rywun arall.

Rheol 14

Rhaid i Aelodau fod yn agored ac yn dryloyw gydag Aelodau eraill, swyddogion Comisiwn y Senedd a swyddogion unrhyw gorff neu awdurdod cyhoeddus arall, wrth ddatgelu unrhyw weithgareddau a gyflawnir mewn perthynas ag unigolyn neu sefydliad, neu a gyflawnir ar ran unigolyn neu sefydliad, y mae gan Aelod berthynas â nhw, y byddai'n ofynnol i'r Aelod, o dan y Rheolau Sefydlog, eu cofrestru neu eu datgan yn nhrefodion y Senedd.

Rheol 15

Ni chaiff Aelodau weithredu mewn ffordd sy'n ymyrryd yn amhriodol, y bwriedir iddo ymyrryd yn amhriodol neu y mae'n debygol o ymyrryd yn amhriodol, ar berfformiad y Senedd neu bwyllgor y Senedd wrth ei gwaith, na gallu Aelod, unrhyw aelod o staff Aelod neu swyddogion a gweithwyr Comisiwn y Senedd, neu ddyletswyddau Comisiynydd Safonau y Senedd neu staff y Comisiynydd, i gyflawni eu dyletswyddau.

Rheol 16

Ni chaiff Aelodau ymddwyn mewn ffordd y gellid yn rhesymol ei ystyried yn ymddygiad sy'n rhoi pwysau ar unigolion i:

- i. gyfaddawdu didueddrwydd gwleidyddol Comisiwn y Senedd neu'r Gwasanaeth Sifil;
- ii. torri Cod Ymddygiad Staff Comisiwn y Senedd;
- iii. torri Cod y Gwasanaeth Sifil;
- iv. torri Cod Ymddygiad Staff Cymorth; neu
- v. ymdrin â cheisiadau am wybodaeth ac eithrio fel y nodir yng Nghod Ymarfer y Senedd ar Fynediad Cyhoeddus i Wybodaeth.

Rheol 17

Ni chaiff Aelodau, mewn perthynas â datgelu gwybodaeth:

- i. sy'n gyfrinachol neu wedi'i farcio i'w ddiogelu fel arall, ei datgelu ac eithrio pan fo awdurdod i wneud hynny gan y person neu'r awdurdod sy'n rheoli'r wybodaeth neu pan fo angen eu caniatâd i'w datgelu yn ôl y gyfraith;
- ii. defnyddio'r wybodaeth a dderbynnir yn gyfrinachol heblaw yn rhinwedd eu swydd fel Aelod o'r Senedd, ac ni chânt ddefnyddio, neu geisio defnyddio, gwybodaeth o'r fath at ddibenion maleisus, dibenion mantais ariannol neu unrhyw fantais bersonol arall; nac
- iii. atal unrhyw berson rhag cael mynediad at wybodaeth fel y caniateir yn ôl y gyfraith.

Rheol 18

Ni chaiff Aelodau annog Aelod arall i fynd yn groes i unrhyw un o'r Safonau Ymddygiad Personol hyn, gan gynnwys y Rheolau mewn perthynas â chwynion ac ymchwiliadau safonau.

Rheol 19

Rhaid i Aelodau gymryd camau rhesymol i sicrhau bod eu staff, wrth weithredu ar eu rhan, hefyd yn cynnal ac yn gweithredu yn unol â'r Rheolau hyn a'r Egwyddorion Cyffredinol.

Rheol 20

Rhaid i Aelodau dderbyn unrhyw beth a gyhoeddir yn eu henw p'un a gafodd ei gyhoeddi gan yr Aelodau neu eu staff, ac y byddant yn cael eu dal yn gyfrifol am hynny.

Rheol 21

Rhaid i Aelodau gydweithredu â Chomisiynydd Safonau y Senedd wrth ystyried cwyn ac unrhyw ystyriaeth ddilynol o'r gŵyn gan Bwyllgor Safonau Ymddygiad y Senedd.

Rheol 22

Rhaid i Aelodau gydymffurfio â'r Weithdrefn ar gyfer Ymdrin â Chwynion yn erbyn Aelodau o'r Senedd

Rheol 23

Ni chaiff Aelodau ddatgelu manylion mewn perthynas â:

- i. unrhyw ystyriaeth o gŵyn gan Gomisiynydd Safonau y Senedd ac eithrio pan gânt eu hawdurdodi i wneud hynny, yn ôl y gyfraith, gan Gomisiynydd Safonau y Senedd neu awdurdod ymchwilio arall, nes bod naill ai Comisiynydd Safonau y Senedd, neu Bwyllgor Safonau Ymddygiad y Senedd (os anfonir y gŵyn at y Pwyllgor) wedi dod â'r mater i ben; na
- ii. trafodion Pwyllgor Safonau Ymddygiad y Senedd mewn perthynas â chwyn, oni bai bod y gyfraith neu'r Pwyllgor wedi awdurdodi gwneud hynny, nes bod trafodaethau'r Pwyllgor wedi dod i ben neu fod adroddiad y Pwyllgor wedi'i gyhoeddi.

Rheol 24

Ni chaiff Aelodau lloïo aelod o Bwyllgor Safonau Ymddygiad y Senedd, na Chomisiynydd Safonau'r Senedd, na'u staff, mewn ffordd y cynllunnir neu y bwriedir iddi ddylanwadu'n amhriodol ar ei ystyriaeth ynghylch p'un a dorwyd y Cod Ymddygiad ai peidio, neu mewn perthynas â gosod cosb.

Rheol 25

Ni chaiff Aelodau geisio dylanwadu, annog, cymell na cheisio cymell, person sy'n gwneud cwyn mewn ymchwiliad i dynnu'r cwyn yn ôl neu newid ei gŵyn, neu unrhyw dyst neu berson arall sy'n cymryd rhan mewn cwyn i dynnu tystiolaeth yn ôl neu newid ei dystiolaeth.

Rheol 26

Ni chaiff Aelodau gamliwio unrhyw argymhelliad a wnaed gan Bwyllgor Safonau Ymddygiad y Senedd mewn perthynas ag unrhyw gŵyn y mae wedi'i hystyried, neu unrhyw ganfyddiadau neu adroddiad gan Gomisiynydd Safonau'r Senedd.

Rheol 27

Ni chaiff Aelodau wneud cwynion gwamal, blinderus neu sy'n amlwg yn ddi-sail i Gomisiynydd Safonau'r Senedd.